



陶菴集

二十

墓表
墓誌

~ 16
2325
20



2380₂₀
2325
卷 25-20

陶菴先生集卷三十九目錄

墓表

贈判書趙公應社墓表

學生奉公時中墓表

生員韓公孝祥墓表

學生李公起肇墓表

從仕郎鄭公龜微墓表

學生李公應瑞墓表

學生羅公世器墓表

學生李公應微墓表



通德郎李公後晟墓表

通德郎金公相鉉墓表

通德郎洪公禹績墓表

進士韓公道愈墓表

贈參判趙公奉夏墓表

進士柳公漢墓表

學生黃公緝墓表

生員金公鐵根墓表

處士老學齋鄭公五奎墓表

學生俞君漢龍墓表

副正安公應河墓表

縣監鄭公周翰墓表

宣傳官李公後儀墓表

贈僉正徐侯敬忠墓表

縣監趙侯厚錫墓表

太醫安君孝男墓表


禦侮金君德峻墓表

陶菴先生集卷三十九

墓表二

贈判書趙公墓表

贈吏曹判書趙公應祉字子綬者重峰先生之考也
 其 贈以先生從勳墓在牛渚書院後幾十步牛渚
 者先生書院也夫人龍城車氏江陵金氏從葬先生
 車氏出先生歿後百有餘年院之章甫相與謀是墓
 也歲久崩夷後誰能辨之先生而有知豈肯安於俎
 豆之饗於是立石以表之江都雷後俞侯拓基實相
 之役章甫請緯記其陰竊謂先生之生固天地間正



氣所鍾而蓋亦有眙胎於前光者惜乎其世德之美不可得而詳也然而以先生爲子他不必書也詩曰民之秉彝好是懿德又曰維桑與梓必恭敬止苟有人心者莫不知好先生之德苟能好先生之德者莫不知敬先生之所敬嗚呼千百代之下疇敢有踐是墓者

學生奉公墓表

嗚呼此孝子奉時中之墓也奉氏出河陰高麗衛尉卿佑其鼻祖而入本朝有諱曰由禮曰楫仍父子判書其後兩世判事允仁訓導璋於孝子爲考若祖其

居則南平縣之竹林村也孝子長而受學于苔軒高公敬命之門世傳訓導公病裏思江鮮公設網求之值風雷不可得號泣而歸道中忽有尺鯉潑刺取而供之訓導公疾遂瘳後丁訓導公憂廬墓而居之朝夕哭展又必歸家省母有虎相守不去又若護之行者人皆異之才除喪竟以積毀成疾年三十三己巳卒卒後萬曆己酉鄉報于縣縣聞之朝始命復戶辛亥特旌其門曰孝子嗚呼江鯉之躍自王祥孝感始見于史末世滋僞鄉里之誦孝子必援以爲常始則千百歲董一有之今則殆無邑不有虛實之相

隆菴先生集卷三十九
混有如是夫如公實行亦在其中人或疑之然其家居事親之節固已有大過人者乎信於一鄉一縣豈無所以也哉有如是之行則必有如是之應者即其理然也使公而無此應則自古孝感之事皆無足信矣烏可以珉之可惡而遂失其真玉也今去公之歿幾二百餘年而公論尙不泯至今指其村曰孝子之里非公深愛惻怛出於天性何能感人若是其深也哉况其後孫皆能以孝業家亦可見鳳凰之一羽也余生衰世不敢不致謹於誠偽之分於是乎書

生員韓公墓表

牛溪成先生門下多一世賢俊論易學則有曰愜素韓孝祥景休先生嘗贈詩曰餘事鍾王筆專心先後天其獎許可知公以嘉靖乙丑七月九日生而穎異學語便識字既長讀書勵行姿稟超格中萬曆庚寅生員先生歿後被羣壬構捏名在丹書公慨然獨抗疏伸理上特降停舉之命自是廢舉業構小屋扁以玩五蓋取諸圖書中五數之義也公性度沉凝喜怒不形家素貧疏糲不繼而處之適然不以介意惟嗜義理如芻豢視富貴如草芥講學則必本於窮格反己則必謹於幾微其卓識高論必多可

傳者而兵燹之餘家乘散逸無徵尤可惜也公酷愛山水乘閒喜歷覽遠近嘗避寇至安陰居焉丁酉天將劉綖大捷于南原權元帥慄將樹碑知公筆藝邀使書之南原有劉總兵碑卽其筆也 萬曆乙巳七月五日卒壽四十一葬于廣陵蔭村壬坐之原韓氏出清州自高麗太尉蘭始見于譜柳巷諱脩最爲聞人入本朝有諱尙敬開國功臣領議政諡文簡再傳至繼禧爲 成廟佐理功臣曾祖諱胤昌禮曹參判祖諱克恭別座 贈左承旨考諱天賚生員 贈吏曹參判妣礪山宋氏監察復興之女四男必震都

事必恆必益必升直長如琦長房出而廷羽其繼子聖時聖朝其孫如晦次房出而廷矩廷輔宣傳官廷柱廷五廷羽廷老其子聖胤熙朝聖後聖繼聖緒聖縱聖績聖維聖徽參奉聖緝聖級振朝師朝任朝其孫也

學生李公墓表

李公起肇秀初全義人世居忠州之可興鄉鄉人稱爲長者年四十四 顯宗甲辰三月三十日卒始葬州北後遷于葛洞亦州境也其媿漢陽趙氏祔公頤而長動止有度自以腹子有終身之哀於其緬也築

室於墓下朝夕上墓若孺子泣者服除乃去貲產之
自本宗來者悉歸之以助其祀田宅或為人橫占亦
與之而無爭其行義若此上祖高麗太師棹本朝孝
靖公貞幹奉壽母以至孝聞左尹士寬都觀察使孝
長繼顯後三世有諱允成 贈參議生汝溫汝良汝
溫之子曰元忠同知中樞府事汝良之子曰顯忠寔
公所生而同樞公取而子之公男女皆三人尙賓光
賓觀賓女適尹興禹尹偉其長則為公疾斲指進血
未字而死尙賓無嗣以光賓子萬根為後生員萬標
萬楨萬樞萬枝觀賓出來請余文者萬根之子鼎燁

也

從仕郎鄭公墓表

公諱龜徵字文瑞延日人圃隱先生其十世祖也曾
祖別提諱膺善祖典籤諱雋考郡守諱雲翰三世
贈左承旨外祖曰泗川睦承祚公以 崇禎戊辰生
早失怙恃終身以為慟語及必流涕伯氏在京病急
一夜之間奔赴二百里地及喪哭泣哀毀一如喪考
其篤於友于如此雅不喜勢利紛華雖為門戶計強
赴公車而終不以得失經心晚而卜築於驪江之上
以詩酒碁局遣懷間又漁釣為樂鄉黨爭慕戶屢常

降禧先生集卷三十九
滿辛亥正月二十二日卒葬于本州雙峰山下負庚
之原配靈山辛氏應宗女甚有婦德且善治生以業
其家後公三十二年歿墓於龍仁文章洞五男纘憲
參奉纘祖纘昌纘成纘章二女適都事金世瑛士人
姜錫三側出男纘立孫男鎮錕鏞鏐鏐鏐鏐鏐鏐鏐
鉞鏜曾孫觀濟興濟謙濟健濟順濟遠濟時濟一濟
弼濟嗚呼公以大賢後承有才有行終不得少顯於
世而子孫之衆且盛如此天之報施其在斯歟是爲
表

學生李公墓表

李徵君載亨北方之望余久聞其名心欲一見而未
能也一日徵君具書幣走數千里爲其本生親應瑞
請樹墓之文余讀其狀而歎曰此質直好義人也嘗
謂徵君奮起遐陬篤志爲己姿質固過人而意亦有
父兄師友之賢今果然矣公字國禎全州人遠祖世
良謫鏡城子孫仍家焉嘉善中立武科尙孝學生晟
爲公三世 孝廟丁酉吾外王考閔文貞公守是邦
大興禮學選邑之俊秀以充弟子員公與焉文貞公
亟稱許之屢發解鄉人又舉其器識行誼卒不成一
名 肅宗乙酉五月十二日卒年七十配陽川許氏

陽春先生集卷三十一
先公一年生終於庚子有女士風男曰載泰曰載興
載亨掌樂院主簿序居二而爲人後者玄希高崔斗
柄宋弘緒其女婿也公內行甚篤母張孺人嘗曰吾
兒自幼未有一事不稱意者叔祖居數里餘非甚病
日必晨見遇甘旨必分之治家井井有法內外肅然
教子弟以孝悌爲先以財貨爲戒其在鄉庠嚴繩約
以先諸生雖麤厲者亦不敢肆而又能容人細過故
無憎惡於人身在畎畝不忘忠君於是非邪正之分
尤截然也當 坤聖遜位粟牛兩先生黜享之時慨
然欲伏闕上書邁癘瘡不果行蓋公可見之行如此

而悉本之於學平生喜誦論語又抄禮書二冊以爲
一家則嘗語學者曰讀書之序當先四子而誠敬二
字爲之要且曰利者百惡之根一有此心明者不明
剛者不剛嗚呼辨別義利是儒者第一義而爲學之
方端的又如此宜其以徵君爲子也抑又聞文貞公
與公帖屢有爲公賀書之語實公所請而其書皆性
理文字公之所以善身而裕後者都不外於是若公
可謂識其大者矣余固不能文而嘉徵君之孝又悲
公湮歿不稱書其志行之大者以刻于石使世之知
徵君者咸曰非徵君之賢而厥考賢也北方之士尙

陽春先生集卷三十一
或有以勸焉

學生羅公墓表

羅君炯奎從余遊一日泣而言曰吾父自少師事尤菴先生先生之北竄也徒步往從之先生作詩以贈及先生受後命吾父亦違奇禍不克拜訣終身以爲恨吾父嘗痛嫉北人餘孽之復肆力持正議又賊臣宗道之自羅州移配實文谷相公建請而吾父以州人素與文谷好凶徒意此事之出於吾父也挾憾交擠遂有六年縲縲之厄不有甲戌吾父幾不免矣自是絕意進取杜門淡居日親義理文字蚤夜講討

惟恐一言一義之或悖於師訓內行甚備而尤篤於友于鄉人再薦於方伯則輒移書止之曰無其實敢處其名乎吾父生而危辱叵測死而湮沒不稱苟君子哀憐而賜之一言卽不悼其不幸於土中矣余聞而歎曰孔子不云乎鄉人皆好之皆惡之不若善者好之不善者惡之乃翁之所見惡於鄉人者卽爾瞻宗道之徒則其好之者必善者也况死生禍福之際衆所勸勦而所守益確然觀乎其言志之作可知信乎不愧爲先生弟子也炯奎起而泣曰得此於君子足矣請歸而刻諸石公諱世器字子長世居羅州五

隋書卷之三十九
世祖昶 中宗朝選湖堂官止持平祖諱海鳳別提
考諱俊參奉皆鄉之望士公卒於 肅宗已卯八月
二十七日年五十九葬于州西沙器村葬而同崗者
礪山宋氏而富平李氏有女士譽後公三十五年而
歿別葬靈巖之燧院其繼配也男三人炳奎宋出進
士燦奎及炯奎李出炳奎男廷泰廷軾廷泰廷軾之
男得綸得經云

學生李公墓表

李公應徵休卿年二十二卒其從兄應瑞以其子載
亨爲之後載亨時三歲既長呼而詔之曰乃父生八

歲喪其父母鞠於吾父母又從吾學吾父母哀其零
丁不甚勸課而能自力不怠 顯廟甲辰畏齋李相
國端夏以評事來日與諸生講學乃父時最少畏齋
公甚愛之授以朱子書乃父心悅之窮晝夜矻矻間
又抄寫成帙常以自隨其嗜學如此終身銜恤聞人
呼父母未嘗不流涕每生日廢食悲號其事吾父母
若孝子之事父母與一姊友愛淡至姊既字不忍離
舍姊壻感而同居擇其田僕之好者以資之其篤行
如此汝敬識之載亨受而不敢失後幾年具狀一通
使其子涵請文於余曰載亨生不識先人面况於德

降者分生集卷三十一
行乎惟幸而得於家庭者如此而又將泯沒無傳矣
載亨老白首朝暮且死恐無以見二父於地下且記
載亨嘗一拜畏齋公公歎曰溫雅介潔安得復有如
若翁者載亨幸而得於當世大人者又如此敢藉手
以請余曰余曾爲尊伯父表其墓矣尊伯父質直無
華於子弟非苟譽者况畏翁世所稱名卿其言足以
不朽矣盍歸而刻諸涵起拜曰請以是復於吾父公
全州人考暹妣忠州池氏以節行旌闈祖尙孝武科
曾祖中立老職嘉善其家于鏡城則自六世祖世良
云公之卒在丙午正月十七日室朴氏欲捨命下從

引刀自剄傍人急救之不死後十年父士彥憫其羸
瘁強以肉朴氏不忍違而又不忍苟生卒如其志今
上丁巳 命旌其門載亨以學行被徵官掌樂院主
簿三男涵其長次湛次浣

通德郎李公墓表

公諱後晟字晦卿我牛峰之李同祖侍中公靖在麗
末分爲兩派曰判書喬曰判事周判書卽公之先也
其後有司憲府執義緝執義二男世鑑舉行諛別坐
世銘翊衛司洗馬已卯名人洗馬生諱偲都摠經歷
生諱義元同知中樞府事生諱宙娶寧越辛氏監察

汝和之女無嗣取公子之其本生親曰憲別坐公之
曾孫公 崇禎癸未生出遊庠序有聲士友間屢發
解不中遂去之奉母夫人寓居坡山採山釣水以供
甘旨母夫人卒益無意於世杜門窮居書史自娛以
終其身年六十七已丑六月一日卒葬於本州基洞
癸坐之原室完山李氏通德郎縛之女先公十年卒
至是耐子灑沆灑子曰命悌沆繼子曰命悅公聰穎
夙成九歲以母夫人命奠于姨妹壻李獻納迥之喪
動止如成人在坐卿宰莫不驚歎少時所與遊多名
勝及其貴不一跡其門家貧疏糲不繼而平生口不

出乞字鄉人皆義之嘗愛一古梅公卒而梅亦枯死
嗚呼吾宗姓甚鮮少又不克自振如公文行之美者
蓋間有焉而亦不能少有所施豈運既衰而不可復
回耶何天之畀之厚而嗇之甚也余悲其泯沒而不
稱也略叙此使揭于阡上余判事公之後也

通德郎金公墓表

善山金生宜礪嘗令其二子從余遊余又一過其坪
城幽居陂池田園殊有湖海豪氣去年病且死以書
屬余曰吾父諱相鉉字台甫有行無名坎坷終身其
可見之行有不忍泯沒無傳嘗願得君子一言之重

而今則已矣苟不以將死之言而棄之則可以瞑目入地矣余悲其意亟取其狀而讀之金氏之居善山蓋自麗朝一善君鍾始入我朝有諱就文文科大司諫號久菴受業於朴松堂之門大爲諸賢所推重見於退溪集中是爲公高祖也曾祖諱宗儒早游牛溪之門與沙溪文元公相友善祖諱翽內侍教官號拙翁甚有士望尤菴先生備述兩世實蹟考諱時閔有至行早歿妣延日鄭氏承議郎維城之女李玉山瑀之外孫公以崇禎癸未生纔二歲而出爲叔父諱時顏後公天姿旣純粹而鄭夫人常曰使汝早孤無

教吾所痛心古人不云乎寡婦之子非有見焉勿與爲友爾宜刻骨手書其言以戒之性至孝其事父母也雖處貧弱而志物之養無不適其心意者嘗治舉子業而非其所好自見己巳陽九之厄絕意進取築石泉精舍惟以詩酒花卉自娛丁丑沙溪先生從享聖廡之請八路合辭而嶺中不逞之徒投疏沮遏誣毀罔極公不勝憤然倡爲辨誣之論道內響應而推公爲疏頭以人望所歸也自是士類之倚仗忒甚凡於斯文大小事無不主張焉平居專以讀書治心爲務至晚年疾病侵尋而未嘗有懈癸巳十一月二十

一日卒享年七十有一明年正月葬于家後十月遷窆于開寧縣東崇山壬坐之原公德性渾厚質慤平生不作崖異之行其所致力不出乎人倫日用之常生事葬祭情文備至事親之始終盡矣處兄弟以友接親舊以恩由親及疎秩然有序謙遜自牧温和樂易與人言恂恂然若無可否而好直惡佞根於秉彝嘗於洛中邂逅丈巖鄭公澔許以知己別後猶惓惓不忘鄭公對人輒曰金台甫志行之高古氣槩之磊落非近世所易得者及其歿也又有詩悼之曰磊落嶺之秀吁嗟今也亡古語云不見其山願見其木豈

不信然公娶平山申氏統制使瀏之女有女士行舉四男四女男宜鼎宜鍊生員宜鍵宜礪其季也女適士人呂光錫沈國藩崔應泰孫壽海孫曰履淵履泰進士履成履進履延履遠履運履遇餘不盡記

通德郎洪公墓表

余既爲洪宜寧先生作樹墓之文矣其孫佐郎河瑞克趾其美而不遇於世坎壈以終余素賢其人又銘其墓傳于後朴君聖源復以所爲通德郎諱禹績狀示余宜寧先生於公爲曾祖而河瑞其子也嗚呼靈芝之無根醴泉之無源古人或疑其言觀一羽而可

以識鳳凰之全體者亦其理然也夫爲人子而事父母鮮克盡其職若生死兩盡愛敬者卽宜寧先生所嘗行而公則循之其所教乎佐郎公者亦不外是是則其所以繩先而裕後者足以化於鄉而爲法於國矣豈不休哉抑又聞佐郎公之擢第也知公者莫不謂公積德之所發而公旣不得久享榮養佐郎公又不幸沉屈而歿是若可疑者然聖人之論孝曰不謹其身雖日用三牲之養猶爲不孝朱子云富貴易得名節難保以俗情則固多歸乎富貴而以朱子之意觀之則豈不曰其輕若此其重若彼哉然則佐郎公

一生謹身要以不失其名節其孝益可見矣烏可以此而疑於天道也公生於 孝宗戊戌卒於今 上癸丑享年七十六葬于廣州栗里坐卯之原配昌原黃氏祔凡三男河瑞之弟洛瑞亦夭季曰漢瑞漢瑞從余遊能世其學公之餘慶其在是歟

進士韓公墓表

韓侯道愈濟汝世居南原之魚隱谷歿而葬於城南後十一年丁未遷于淳昌之栗北室安東金氏祔始侯臨命囑其子宅成曰吾父母異葬宅兆且不利他日得一邱以酬吾志仍埋我於其下卒如其言旣而

陸者先生集卷三十九
宅成將樹表墓前謁余於寒泉之上請爲文余不能
辭蓋聞侯至行出天其侍母疾也身有瘡畏其傳染
別具一席而坐起則撤之時年七歲丁丑大疫洊遘
喪禍侯亦幾殊而甦猶自力粥飲斂葬一以禮已而
癘益熾東西奔迸所至必先營一室以奉父筵几又
隨以妻若姊之喪未嘗一日闕奠人以其難終身有
孺子之慕每日晨謁非甚病不廢祭時勅家人齊沐
百物蠲潔入祠屋必涕見先人筆迹亦涕寡姊挈子
來依事之如母姊歿仍鞠其子娶而家之又置祭田
屬季子使祭庶母及其腹子未筭而死者自少病不

能讀書而沉思默識平居守分無外求性喜儉約絕
不近奢靡之物治家制事各有條理教諸子必先孝
悌而後學文嘗曰羣居終日無所用心酒奕談詠不
顧父母之養是君子之罪人也又痛禁其交結異色
之人以是子弟皆以勤謹持身又善誨村秀才多所
成就云余與韓氏有世好而偶不及識侯其得侯事
行於宅成者如此而宅成又泣曰吾父嘗言今人爲
親狀誌惟事夸大於本分有何益而豈不爲死者之
羞不肖藏之而不敢忘嗚呼其言益可信也韓清州
大姓太尉蘭之後入我朝清城君終孫清城之曾孫

輓文科壯元承旨於侯爲高祖其後僉正應文判官
慶生皆由蔭進考碩良生員鄉里稱其行義侯 肅
宗癸亥進士宅成亦進士三世能以文業家又可貴
也侯生於己亥八月一日卒於丁酉七月十二日金
氏進士重鉉之女婦德甚備年四十一卒二男宅成
其長次永成婿曰金重后德成及女爲鄭受益鄭翊
周妻者側出也宅成男邦老永成男邦杰云

贈參判趙公墓表

有以文武才見賞於名公鉅人而卒蚤夭不一施者
曰趙公泰夏士大其先出高麗大將軍璋數世有玉

川府院君元吉玉川淳昌故號子孫遂爲淳昌人曾
祖元弼府使祖副護軍聖考考 贈承旨爾鼎妣延
安李氏其考觀察使天基承旨公之弟進士爾呂亦
贈承旨無子取公子之公白皙疎眉目性嗜書讀書
必儼然正襟以至几案簞席靡不潔整與人言氣岸
軒豁於財利泊如也喪有疾終不進薑桂每以生不
盡養爲痛或食有重肉則泣不食曰吾母在時惟蔬
糲耳與三妹同居湛樂甚至少治明經業務究其大
義又捷大小發解膽力俱絕人不欲人知之老峰閣
公鼎重欲以將才薦于朝不果生於庚子九月八日

陶菴先生集卷三十九
卒於壬申四月九日始葬高陽後改卜交河青巖里
坐辛之原兩夫人耐高靈朴氏參判相馨之女事舅
姑孝舅之喪貧無歲月制夫人一皆取辦使無憾年
二十六歿有子曰命臣驪州李氏庶尹東亨之女莊
淑有婦道撫愛命臣猶已出其歿與公同年而月日
後歿也男虎臣女適朴命升命臣由承旨出爲廣州
府尹 贈公參判虎臣今爲全羅兵使噫以公器行
若有以爲而止於斯善乎歐陽子之言曰爲善無不
報而遲速有時今兩子以文武進天之報公固於是
乎在

進士柳公墓表

公諱漢字汝浩文化人上祖高麗大丞車達入我朝
贊成鼻殊最顯祖諱承春考諱曼世以孝友承家外
祖昌寧曹沃梅溪偉之後公爲人白皙美鬚髯器度
嶷然幼而見窮族哀之脫新衣以衣之及長遊尤菴
宋先生之門冠婚喪祭一以家禮爲準丁卯進士已
巳 壺聖遜位公同諸生叫閣不果上退而居于扶
江之上至甲戌始復應舉公文辭贍富且工於筆翰
而竟不第親故有達者一不迹其門處鄉黨以和教
子弟以法周恤貧窮常若不及鄭持平澤雷黃義州

一皓之從享義烈祠也公實倡之其崇獎節義如此
壬寅九月九日卒年六十三配達城徐氏同知中樞
文縉之女先公四歲歿公葬于濂滄里去其宅若干
武孺人耐焉六男一女相助相華相夏相殷相魯相
漢婿曰鄭棹熿煜長房出熿熿三房出相助使熿來
請樹阡之文余不及識公而詢諸湖右士友蓋所謂
一鄉之善士也

學生黃公墓表

近有力於爲善而不求人知類非今世之士者黃公
錡仲開其人也黃出昌原麗侍中忠俊乃其鼻祖入

國朝宗親府典籤諱湯卿有五子皆爲顯者公之高
祖曰翰林諱城曾祖諱自中府使祖諱瀏通德郎考
諱道宗以其爲仁烈王后外祖奉祀孫故兒時入
見孝廟于宮中賜食推膳恩禮特優而及長廢
疾不仕室全州李氏同知廷隣之女公以顯宗庚
戌生八歲以母命就學於龍仁德義洞舅氏家仍隨
往舅氏光陽任所以親庭隔遠日夜思慕至廢寢食
未幾慈氏訃至公年甫十歲哭擗無數居喪之節儼
若成人舅氏愍其柴毀勸以薑桂之滋涕泣不從及
歸本家以家無主饋供養嚴親克致其誠不獨躬奉

几筵而已至葬值大雨哭泣哀憾無一失禮觀者悅服服闋無家可居常傳寓於族黨家每讀書未嘗不危坐長者稱之曰天生學者間赴公車輒自製自寫人謂窘束不利於得則應之曰雖不免以得失存心筆亦何敢倩人耶比丁父憂執禮一如前喪合窆之際雖家力不給而能自盡於送終之節墓在十里之地朔望外哀至則往盡日號哭淚盡以血墓奴感激出涕及吉仍廢舉業破屋滲漏殆少坐處而終夜讀書不肯少輟於書酷好孝經日日三復或謂此非科舉之用讀之何爲公曰黃山谷言士大夫三日不讀

書便覺語言無味面目可憎書豈可以功名得失或廢哉吾則斃而後已此外更有何事於朋友久而能敬於親黨務爲敦睦對人無他酬酢惟與人子言必主於孝與人臣言必主於忠鄉居四十年慎交遊簡出入一以守拙養靜爲心雖窮居而國家之憂未嘗少弛欲以十事陳忠而越越未果上仁愛出於天性雖肖翹之微不忍傷害謙恭自持與物無競宅心制事絕不爲功利之說所撓所守確然有千萬人必往之勇雅喜酒而一盃之外不一破戒又不好諧謔或於稠人中有放肆少禮者輒避而不與坐迹公實行

陶菴先生集卷三十九
蓋不特一鄉善士而已使其早遊大賢之門以廣其
識見益勉其遠大之業則其所成就豈但如此而已
哉是可惜也公以己未十月八日卒壽七十葬于鐵
原德立洞與向之原配原州李氏耐公之子明河從
余遊有年以是慣聞公德美略書此使揭于泉隧以
塞孝子之心以爲善士之勸云

生員金公墓表

嗚呼此金公鐵根石心之藏也石心先余二年戊午
生生而聰穎八歲能詩吾祖考議政公於公爲外從
大父嘗呼公使余同賦卽景公應聲而對有梨花風

來滿院香之句議政公歎其絕調顧謂絳曰汝不及
也由是才名藉甚晚中己亥司馬辛丑倡率館學儒
生上疏討逆臣柳鳳輝之罪盡室歸全義之楓溪全
義卽公外祖打愚先生卜築之地而公考主簿公諱
恆壽寓居者也公旣還舊廬斷置世事惟以書史自
娛酷愛松竹菊扁其堂曰節友以寓歲寒之意吾仲
父歸樂公竄扶安公匹馬往問仍徧遊邊山而歸戊
申十月四日感疾卒金出光州高麗忠臣直提學若
時之後公凡再娶參議韓山李禎翊女無育西原郭
氏其父王子師傅始徵有女士譽二男一女長得性

陶庵先生集卷三十九
次得運出爲季父後士人朴光宙壻也公天資仁孝
事親無違志信義素孚於朋友詬訾不及於奴僕與
人處襟懷坦蕩不設畦畛喜道人之善恥言人之過
爲文多積博發下筆立數千言性嗜酒遇輒引滿遺
命祭用一大椀不問家人產業間多絕爨而適然也
人勸之仕則曰吾非掉頭於祿仕士子持己如處子
但不可自求耳公爲人忼慨最嚴於陰陽淑慝之分
語及時事指斥無所顧忌或至流涕杜少陵詩不及
見清時嗚呼就窳窳者正道公心事也得性來乞文
略叙此而歸之使刻于石

處士老學齋鄭公墓表

嗚呼此吾友鄭公五奎子文之墓也公長余二歲生
并一世而到老始相識公嘗得余乙巳封事讀之沉
思數日歎曰方今是非紊而忠逆混惟此一言庶幾
徵信於來後歟士友爲余道之若是余又聞公雅嗜
讀書中年好住山房達曙不寐老禪之苦行者亦自
謂不及云甚可敬也未相見而心相契許已如此則
及見其喜可知也公少從遂菴權先生學先生器重
之以母遺命未忍廢舉業然不曾以得失關心屢過
余於寒泉之居余亦嘗舟下黃山訪公于鼓巖每語

竟夕而不知倦竊觀公爲人敦重內蘊聰明於經傳諸書靡不淹貫而尤好朱子書以此爲究竟法門路既正踐履甚篤余閱世蓋久而如公學道真實者鮮矣公嘗謂余曰吾輩年迫日索不可不汲汲爲學而無如離索何有疑相質惟書札一路耳其後有一二往復而亦不能繼也余聞公疾劇走書以問之書未達而訃至遂爲位而哭之嗚呼吾輩晚暮相期其止於斯也耶公光州人高祖諱保門縣監曾祖諱維郡守立節昏朝祖諱時亨牧使考諱敷有文行不仕外祖洪歲官監司號清溪公配光山金氏僉正萬竣之

女二男三女揀掄參判李匡德士人李商重任取中其女壻也公世居林川以甲子八月二十九日卒于獨松亭壽六十七某月某日葬于同郡頌詔院某坐之原余題其墓曰老學齋蓋公於學不自知其老而意欲斃而後已雖以公謙德亦所不辭者也

學生俞君墓表

俞君漢龍嘯翁年二十九有志有行而死三州李緯題其墓曰君杞溪人父彥嵩祖順基大耋僉樞以孝贈戶曹參判君生而溫雅良善之性發於色辭事父母若王父盡其愛敬鄉里稱以端士庚戌同吳君瑋

從余學以寒泉與君所居陽城接壤也君先治舉業而非其好及得小學讀之喜甚曰此足以爲吾終身師法蓋將以是從事焉進進不已而遽亡矣君生於甲申八月三日歿以壬子三月三十日葬于安城玉井之先兆凡再娶一男世柱繼配李氏出噫君與吾弟大心同庚而俱不幸早夭余素所嗟惜而君有嗣續猶勝於大心詎非幸歟余故哀而表之曰嗚呼此善士之墓後之人無或夷之

副正安公墓表

今有勇力足以雄萬夫而不能用於時志節足以樹

大經而不敢暴於世義形於死難而人或疑以溝瀆之經是其人必死而不瞑以鬱鬱齋志於九原者余於故副正安公應河事輒爲之嗟惋幾於失涕焉公字清仲竹山人其先出高麗少監濬國朝有延昌尉孟聃尙世宗公主其第三子桑雞敦寧都正又三傳而郡守諱士欽是爲公考外祖大司憲唐津韓淑公少治文又工於書郡守公之爲盈德也兵使某巡至縣見公雄勇歎曰此國之干城焉用屑屑章句爲哉贈以弓矢及馬壬辰亂作朝廷調武士從戎公隸東道帥幕道聞李鎰敗乃罷從郡守公于安峽山中

鎰由峽路將赴行在募壯士公入見鎰與語大悅鎰宿將雖新喪師而號令嚴肅嘗以失律將盡戮五十餘人公亦與焉臨刑仰天而笑鎰曰何笑也公曰公糾合義勇將以有爲也而今遽盡誅之公獨往何爲鎰乃赦之至龍灣力戰屢有功補守門將尋登別科宣傳官備邊郎不次擢用訓練院主簿都摠府都事經歷復入訓練爲副正外則喬桐縣監會寧洪州判官平海則未赴會寧時朝廷患降倭數叛密旨令所在悉誅之在會寧者亦數十人公設樂以邀之酒酣伏發殲焉有一酋未醉拔劍起公亦拔劍起相

去數武許倭飛刃擿公公迎擊之砉然落地有聲遂就斬之宣廟嘗於行殿望見公曰彼乘駿而美且長者誰也洪學士宗祿進曰臣之姪婿安某也宣廟色喜將駸駸大用未幾宣廟賓天昏朝政亂公素簡亢不附權貴有名官見公沉香纓子欲之咱以腴邑公笑曰我豈納賂求官者坐是沉滯者屢年洪同知熹公婦兄而於章陵爲私嘗於其家一侍食章陵知公多力指磁碗曰公能彈指而碎之乎公曰是何足道哉手握輒碎章陵亟稱之及仁祖舉義素壯公欲必致之有以微意來告者搖手止之一

日洪同知帶劍而來起公曰吾兩兒今夜從綾陽君去矣公正色曰此大事何言之晚也公等勉之義軍過公門具綾城宏字公而呼之亦不應以是仁廟不悅不復除官适變及丁卯之難皆從駕難已輒歸長湍墓下日與村翁野老盃榼相隨若無意於斯世而惟以邊憂孔棘醉或慷慨歔歔丙子胡突入長湍擄府使去公時年六十八欲執勒以往而不知大駕所在乃挈置家屬于近峽復還府下會府使逃還訪公奇策公曰今計惟有集散亡廣招募據險保守以待西路勤王之師合勢以進破退賊虜則前

日見禽之恥雪矣吾雖老亦願從之府使曰諾明日當遣騎相報翌朝有二騎馳來奴奔告曰虜也公曰無怯是府人也近則果虜也或勸以速去公曰吾何可苟避虜及門公持劍而出鬚鬢皤然虜輕之無相害意公奮劍亟斬之又斫其後入者斷其臂俄又有數胡至見二虜仆於前從馬上亂射公插劍於扉急取弓交射遂中箭以卒十二月二十六日也僮僕走避者從林中覘視道其事頗詳葬于府東杏洞異向之原鄉人列公事行請上聞旌表而有不悅者沮之竟不行曾孫絛爲同知敦寧推恩贈訓鍊院正公

隆慶先生集卷三十九
篤於事親雖當干戈搶攘之中甘旨未嘗乏絕廬墓
三年髮爲盡白推以事君盡心職事殉國忘身乃其
蓄積而所常詔教於子弟者亦如此故卒能臨難不
苟致命遂志其亦偉矣然使公得一亭障而乘之足
以控遏虜勢以固吾圉雖不幸摧敗亦可以揚義烈
於一世而顧乃不能焉徒使世之不樂成人之美者
嘒嘒然議其後是則命之窮矣然觀人當於其大處
在反正之際天命人心去就之幾不待智者而後知
矣况如公失志廢蟄者宜若奮袂樂赴惟恐後於人
其取富貴固甚易易而乃逡巡退避自甘沉沒是蓋

有不安於彼而安於此者存後之君子尙或有以知
之公一男一女男大梓婿教官姜元祿大梓三男廷
燧廷燦廷炳綵廷燦之子也綵使其子持平相徵來
乞文略叙公志事之大者使表于阡上云

縣監鄭公墓表

公諱周翰字武卿延日人園隱鄭先生墳于龍駒之
文秀山下子孫仍世居公其九世孫也曾祖震主簿
祖從善縣監俱以蔭考侃 贈承旨外祖判官慶州
金天錫公己酉武科宣傳官武兼惠山加德僉使五
衛將內禁衛將洪清二州營將公以善治盜名辭聽

陳者先生集卷三十九
貌稽發摘如神又嚴猛以臨之在清時監司欲以私
出一囚公不從及巡至因公入見慢罵甚公撒笠上
戎飾擲之於前曰吾所以受君折辱者以此耳不拜
而出監司益怒將啓罷之道過李判書秀彥李曰吾
亦嘗干以私而不得此君倔強公不知耶監司悔之
還車擢謝而去丁丑大饑朝廷以桴鼓爲虞授公新
昌縣盜聞風駭散一境晏然間移慶州營將不赴
肅廟辛巳四月二十六日卒年六十八夫人具氏綾
城大姓旻之女後公十二年卒與公合祔于同縣旺
谷去文秀十里公善事父母母疾時如黔婁棄官故

事待子弟甚嚴不冠不見居官廉謹不爲子孫營產
業少飲酒數斗見人酗狂不復近口慷慨好氣節聞
古昔忠臣烈士之事未嘗不扼腕流涕性又傑鷲不
耦於世以是仕不達無官僂歸田舍往往射獵自娛
公身長八尺勇力絕人望之有威若不可犯云昔漢
文謂李廣曰使子得遇高帝時萬戶侯豈足道哉嗚
呼人生遇不遇命也公其奈何公男二人道徵防禦
使德徵兵馬節度使孫繼述三道統禦使皆公不食
之報也公亦 贈兵曹參判繼述德徵子而爲道徵
後者繼志其弟節度退而老於家以余同是鄉也使

續志來請一言以揭于阡上余雖不及見公而猶能想像其氣槩若公者豈所謂周南置鬼者流歟

宣傳官李公墓表

公諱後儀字汝彬牛峰人高祖諱世銘世子洗馬已卯名賢 贈參判曾祖諱佃都摠府經歷 贈參判祖諱智元訓鍊院僉正考諱寰妣原州邊氏僉正以濟女本生父諱寔公以 崇禎丙子生弱冠遭巨創於客土公雖在哀遑之中初終諸具親自周旋不失禮度見者莫不嗟歎奉母夫人寓居交河墓下盡誠竭力以供甘旨母夫人常稱曰吾兒真孝子也人

不能間焉家貧親老無以聊生文辭優長而晚年投筆獲參丙辰科時武弁多而仕路窄設別取才居首判書李公師命時亞西銓見公講讀歎曰不爲此舉則如此人才何可得也卽除宣傳官從宦數年母夫人卒自是無意於世且喪其獨子志氣益濩落撒還墓舍爲終老計已已閔黯方秉權公之婿與黯爲至親且有別業於公家近地公不一往見不知者謂公驕蹇知公者謂公高也辛巳二月三日卒年六十六葬于古縣新五里某向之原室濟州高氏先公十六年卒至是祔繼子灌女適趙頤貞尹光一灌子曰命

仁尹壻子曰塾壻曰進士韓宗漢公氣度剛正見人不是輒面折不少饒人多畏憚不肯屈首於權貴之門輒軻以終其身其視昏夜乞哀而得官者不啻若浼蓋其天性如此且篤於內行弟妹之昏嫁不失其時姪子之孤者亦收而養之使之成立斯亦人所難及者矣記余幼時數拜公知其爲忠厚長者今於樹阡之文叙其大略如此云

贈僉正徐侯墓表

嗚呼此故宣武原從功臣徐敬忠之墓也 萬曆癸巳咸鏡道都巡察使尹卓然馳啓以一方平定將士

有功者分等以聞而敬忠居一等有曰右人首現於都巡察以退朝社伏兵將聚軍三百餘名屬於李惟一十月德山社十一月洪原之戰多數射中云丁酉又隨別將柳應秀擊嶺之餘寇五戰皆勝兵曹奏授忠武衛左部將乙卯又以 朝命監築吉州城津之城歸老於家年七十三戊寅歿其後老峰閔相國鼎重按是道褒顯壬辰忠義之士而侯獨漏焉後六十餘年其孫永後上言自訟遂 贈侯司宰監僉正侯字君輔徐出利川遠祖高麗章威公熙十一世愈我太宗佐命功臣判書諡良景自其九世祖仁庇遷于

北子孫仍居咸興父千壽祖漢傑曾祖國依妻韓氏
仁鳳女二女壻韓國俊韓興業而國俊之後最繁側
出男德潤天仁俊禮俊智俊信俊而仁俊實尸侯祀
永後其曾孫也永後千里徒步而來謁余文甚勤蓋
聞永後居營府闔閭間能杜門讀禮書余嘉其人書
此以塞其意可歸而刻之墓前也

縣監趙侯墓表

趙侯厚錫受之忠貞公諱啓遠子也妣 贈貞敬夫
人平山申氏母判官全汝珍女國制五子登第者有
褒 贈忠貞公諸子掌令晉錫監司龜錫議政師錫

參議嘉錫并由文科進而其 贈忠貞公某官則實
成於侯侯 肅廟丙辰武科始補御營將官清城金
公錫胄為體察副使幕府盛人望引侯自隨曰此制
闕才也錄保社從勳歷訓鍊院主簿判官為孟山縣
為治廉恪有威首興學勸士又為訓局將官同列有
後宮親屬其人迹甚下侯恥之自引去除瑞山監牧
官善調飢牧人立石思之自後歸鄉里不復仕年四
十六辛巳二月三日歿葬于洪州興寧村坐丑原侯
身長而美鬚髯犖犖有氣槩見不義雖達官要人若
將唾之平居不拘小節而性篤於好善嘗有酒過母

降者先生集卷三十九
怒不悅則俯伏受責退而涕泣徹宵母色和乃已內
從蚤死其子女無歸育而嫁之有楊萬戶者素不相
識道違癘叩門而求活館之舍側藥物以救之死又
棺衣以斂之有賤而孝者一日來延之如大賓謂人
曰此善人也中心自然敬之晚喜書至古今成敗之
迹談論不倦常歎曰恨不早知讀書也遇酒必大醉
醉必歌呼令笛工和之或登山臂鷹或臨海觀漁以
宣其壹鬱焉或勸之仕輒拍手大笑近世門闌莫盛
趙氏以侯之才獨窮其身以終者何哉記昔甲戌間
余聞侯醉宿隣家忽長吁曰國賊未討倫義晦蝕此

豈丈夫做官時耶嗚呼其意可知也侯娶昌寧成時
望女無子取弟郡守裕錫子泰斗爲子泰斗察訪嘗
屬余墓表文不及就而遽死矣余素喜侯志槩又不
忍孤逝者之言略叙此使揭之阡上

太醫安君墓表

太醫安君名孝男早游士大夫間有名 孝廟違豫
屢進藥有效特除僉知中樞府事歸老海西之載寧
年九十歿而仍葬焉歿後十年辛亥大饑時吾外王
考驪陽閔文貞公按關西君蓋嘗有勞於文貞公家
者一日夢文貞公而告之曰闔族朝夕填壑願大爺

隋書卷三十九
憐而活之也文貞公諾之又問若家屬何在曰賤孫
名世遠者在載寧柳洞也文貞公既覺呼燭起坐疾
書以識之仍發關本郡曰某之孫某居某村者即日
起來郡意世遠有罪亟押至文貞公笑而使之前從
容問之一一與夢中語合曰異哉帖給五十斛米以
歸之守令之以賑事來者聞之亦各有餽遺文貞公
命悉致于其家世遠百口得全活且以其餘置田以
奉君祀云余少與士友肄業于白門外與主家少年
閒語自言家中老幼每飯必先祭又上手祝曰是誰
賜也齊曰閔監司大爺大爺如是而後敢食蓋家戒

然也問何故曰不知也又問閔公爲誰曰不知也使
問於其門老而後始知爲吾外王考也歸而問諸吾
舅氏則亦不知也文貞公平日濟人之功蓋不可勝
書而此事絕異其夢寐之間丁寧懇惻如此又况於
人有生死罔極之恩而猶不自有此正古所謂陰德
者矣然非君氣魄精神有大過人者又何能感動得
人抑亦君活人之德積而能發自有莫之然而然者
耶人孰無慈愛之心而其死也冥然無知君則能爲
之赴愬於仁人君子得以覆蓋其後於無窮以此觀
之謂死者有知亦可耶嗚呼其可謂靈也已君順興

隋書先生集卷三十九
人文成公裕之後曾祖長孫武臣兼宣傳官祖義純
父連玉俱折衝君生於 萬曆壬申歿於 崇禎辛
丑二子景昌僉知胤昌司果胤昌三子世遠其長弘
遠必遠必遠之孫曰國賓武科國賓將爲君立石墓
前請余爲記余謂此事遇余而顯豈偶然也哉遂書
此俾刻于其陰

禦侮金君墓表

嗚呼此金君德峻之墓也君德水人自德水徙居松
都凡四世君忠厚質直人也少治產業粗足卽止喜
習武藝夜則讀書史未嘗一日廢事親孝及喪哀毀

盡禮叔父貧無以爲家衣食逐月供給以至諸從昏
娶皆不失時愍宗家陵替爲買田宅以安之親黨待
以舉火者十餘家茂申之難朝家徵兵本府君時在
幕府適病甚強起趨事曰國有難敢顧身乎君有子
曰時鐸自少志學君甚喜之不令治產又不勸舉業
惟買書籍以資之皆經傳性理之書嘗曰自兒向學
吾言語威儀自不得不慎每事必咨問而後決之丁
巳二月十日歿去其生庚申五十八疾革無他言但
曰未見兒學之成就一恨也不得一拜寒泉公二恨
也蓋以時鐸從余學也君有四男長時鍊時鐸其次

陶菴先生集卷三十九
時錡時鏞時鐸來乞文余感其誠略叙之使刻于表
陰

陶菴先生集卷四十目錄

墓表

高祖 贈左贊成府君墓表

曾祖考 贈領議政晚悔府君墓表

祖考右議政府君墓表

從祖都正府君墓表

從祖母 贈貞夫人商山金氏墓表

從祖判書府君墓表

皇考妣阡表

季父觀察使府君墓表



從弟大心墓表

外祖母豐昌府夫人趙氏墓表

墓誌

圃隱鄭先生墓誌

縣監申公吉元墓誌

校理李公尚馨墓誌

花浦洪忠正公翼漢墓誌

都事柳公萱墓誌

觀察使李公天基墓誌

副提學沈公收墓誌

陶菴先生集卷四十

墓表三

高祖考 贈左贊成府君墓表

公諱劼字勤夫牛峰之李肇自高麗侍中公靖入我朝觀察使吉培最顯於公為五世祖曾祖諱承健判書祖諱諶司議考諱之信副提學妣晉州柳氏參奉寅全女公以 嘉靖庚戌生聰穎夙成有至行年十二伯兄墜傷輒左右扶護三旬如一日副學公嘗病篤公出指血以進涕泣祈天疾尋已至喪哀毀幾不全伯父無子取公養于家生事死祭克盡誠禮性仁



厚忠實待人一以慈惠被服寒素於利財泊如也爲
學長於淹博而卒厄于公車壬辰之亂公倡鄉兵欲
勦賊賊猝至公殿而中流丸卒時五月八日也配韓
山李氏公潞女牧隱之後婦德甚備與公生同歲後
卅五年而終合窆高陽之香洞以孫翮貴 贈公左
贊成夫人從 贈如例男有容有敬有光有誠皆無
子季曰有謙參議以學行名世有五男翮都正翎
贈持平俱以孝旌閭翮遺逸大司憲翮右議政翮判
書翮男晚昌進士卽緯先君晚成判書出後翎晚堅
江原觀察使出後翮內外曾玄摠若干人嗚呼公抱

才蘊行遇亂不淑使平生志業不少見於世斯非命
歟然爲善無不報而遲速有時天之報施不于躬而
于其後者蓋於公益信矣墓久無表議政公嘗經紀
而不及就今曾孫晚堅遵遺志捐俸伐石始克樹諸
墓使緯略書其陰如此云

曾祖考 贈領議政晚悔府君墓表

嗚呼此吾曾王考戶曹參議 贈議政府領議政府
君之墓也府君諱有謙字受益號晚悔牛峰人考諱
劼 贈左贊成祖諱之信弘文館副提學會祖諱諶
掌隸院司議而牧隱李先生之後 贈承旨公潞其

外祖也府君七歲而孤十五始受學十七發解嘗從
風玉趙公守倫學趙公牛溪門人後卒業於沙溪金
先生之門又學易於宗室德信正鸞壽所與遊皆一
時名勝屬昏朝敦倫與洪茂績諸公叫閤以明大義
仍自錮于野幾十年 仁祖反正舉學行遺逸之士
府君起布衣拜新寧縣監親友或勸以勿就則謝曰
隨分祿仕是吾志也况有老母在乎是後歷翊衛司
衛率工刑二曹郎司僕寺判官僉正內乘外則咸興
判官淳昌郡守大丘府使由大丘特授通政大夫掌
隸院判決事有剛明廉簡之獎又爲錦城縣監金堤

郡守內則工曹戶曹參議老年優游散秩時與名士
大夫爲耆社會癸卯十二月二十日卒壽七十八葬
於龍仁縣東寒泉之洞夫人坡平尹氏祔夫人處士
弘裕女參判仁涵之孫與府君同年年七十先府君
卒舉五男長翺次翺翺翺丁丑江都之亂夫人投
火翺翺急救之賊又亂射之又翼蔽之夫人全而翺
死翺幾殊而甦翺婦金氏翺婦吳氏亦同死朝廷并
旌之曰孝烈之門翺後爲敦寧都正翺 贈持平翺
用儒學進大司憲翺右議政翺吏曹判書女適縣監
李惇側出翺習翺翺及婿尹撥皆進士議政公三

男晚昌進士 贈判書晚成判書晚堅觀察使而晚
堅出爲都正公後實尸府君祀府君聰明俊偉天姿
卓犖以孤童能自樹立篤於爲善勇於趨義雖浮沉
仕宦不欲自異於衆而其學一以爲己務實爲主故
見於身則繩度嚴密光輝咄赫望之可知爲大人君
子驗諸家則忠孝節義炳烺一世有足以扶世教而
淑人心者而顧乃謙虛冲挹都不自有望尊而愈卑
齒老而益恭位不滿德以垂裕於無窮易曰視履考
祥又曰謙尊而光府君有焉嗚呼我李以清門孤族
蔚然爲詩禮之家是實府君培植之力而究其所以

得此則惟仁厚忠信爲之基耳爲府君子孫者或有
反於是者則無得拜於斯墓之前也不肖曾孫緯謹
記

府君任咸興時沙溪先生嘗有所求府君不欲強
副以詩諷之曰鷹在青天蜂在山此雖細事而可
以觀府君制行之大致也尤菴宋文正公爲府君
大碑而以疎漏爲恨其與吾祖考議政公書舉此
一段曰老先生喜且尚焉對人稱道不已尊府君
風義固今世所無而老先生盛德豈小子後生之
所可窺測哉此不可使無傳云爾

祖考右議政府君墓表

李氏在麗朝侍中三州伯公靖用武略顯三州古牛
峰伯之後五百餘年率以文行業家國朝觀察使吉
培判書承健司議諶副提學之信顯至副學公之孫
參議諱有謙績學種德根深實茂五子皆爲名人長
翮次翹以孝翺以儒術最季翊以文其四爲我祖考
議政府君府君相我 肅宗有忠盡大節於是我李
蔚然爲忠孝家府君諱翮字仲羽妣坡平尹氏處士
弘裕女 天啓丙寅三月三日壬辰生生時參議公
有異夢幼嶷然有器度嘗傷額醫者刺破血淋漓不

目動丁丑闔家遇難江都府君陷虜中主嫗善待之
曰貴人也胡兒問府君名府君曰吾大爺也胡兒從
之者常曰大爺大爺默覘遼瀋山川意欲奪胡騎馳
還會我使至得自周旋以歸時十二歲矣始參議公
臨別語之曰兒豈老死胡貉者比還仲死於孝伯死
而生參議公尹夫人無恙戊子進士乙未文科由侍
講院說書入藝苑爲檢閱待教奉教陞成均館典籍
司憲府監察兵曹郎爲養監通津縣宮奴有冒占蟹
梁漁民利者府君楛而杖之觸 上怒罷職三司交
爭旋寢同春先生仍白某望重他日可大用府君竟

降者久生集卷四十一
引去民立石思之拜司憲府持平疏陳崇儉勤政招
賢講學諸事時法禁廢弛府君申嚴舊制且焚雞堂
國師諸淫祠都下肅然尋褫諫院陳劄惜其去壬寅
爲御史湖南監賑選玉堂吏曹錄屢爲修撰校理季
判書公時或對直人榮之移司諫院正言癸卯吏曹
佐郎丁憂制畢還舊踐陞正郎轉應教間爲司藝司
成司僕正輔德丁未爲執義虜有嘖言相積奉使歸
歸過于上將罰鍰府君奮然曰主辱臣當死倡兩
司論使臣罪且列查問時大臣不肯自當之失請褫
罷三公上震怒並竄于極邊府君得甲山世稱七

諫尋放還踰歲始叙除文宣傳副校理輔德己酉擢
廣州府尹旋移忠清道觀察使時有經界之政府君
克善其終務寬徭厚民上幸溫泉府君引對達民
情理冤獄旌節行翌年因微青罷叙拜承政院承旨
戶曹參議辛亥按嶺南適大饑府君赤誠調救忘寢
與食或單騶勞集一道生靈悉賴以濟及褫歸老幼
填道不能去至今嶺人幾家家飯祝云再爲大司諫
糾一二官邪上責以伐異且疑其擅弄朝權府君
引褫後上因他事移怒命遠竄尋改削黜是時
楨構寵幸府君嘗直書麟坪大君事于史是以有左

隋書卷之三十一 卷四十一
腹之入云府君退居田里課農種瓜以爲樂名其亭曰逸休蓋取金慕齋安國兄弟故事也以嶺營糶政冒文網編配楊根俄釋戊午除仁同府使李元禎以吏書受暇南歸過府府君獨不爲禮元禎恚歸卽自訴於上府君被逮仍列元禎驕恣犯法狀元禎革職府君竟坐奪告身翌年與仲大憲公季判書公同與尤菴先生黨籍府君竄明川十月大雷上警動賜宥凶黨齊尼不能得庚申柙等謀反誅朝著清明府君道拜全羅道觀察使未至擢江華府畱守居數月拜大司憲旋仍任冬擢拜刑曹判書自後歷遍諸

曹爲吏書者四兵書者二禮工者一間爲議政府參贊漢城府判尹知中樞敦寧外則廣州畱守爲大司憲者九癸亥以侍藥勞陞正憲府君當官斤斤守法請託不行在兩銓恢公道振淹滯逆宗杭之被中批也府君繳爭之在憲司每隨事匡正嘗於經筵請選宗英設宗學以教之時上久無嗣府君語及宗社輒流涕丁卯七月晉拜右議政首陳開言路慎官方上幸寧陵府君以年饑上劄諫居數月以疾告府君務抑躁競尤重變更惓惓以君德士論爲主雖不及大有設施論者謂得大臣體疾益急醫問

降者先生集卷四
交道口占遺表乞嚴宮禁杜私逕公視聽進者舊戊
辰五月二日考終于城西第七月三日葬龍仁縣東
寒泉坐丑之原貞敬夫人羅州朴氏祔夫人考曰僉
中樞 贈判書濠祖曰觀察使東說莊淑貞靜六親
誦其德先府君四年卒享年五十八長男晚昌進士
蚤世即粹先君次晚成判書次晚堅大司諫女適判
書洪受憲後夫人慶州朴氏世英之女一女士人吳
履周判書男絀正郎以孝旌 贈大司諫男綬維洪
判書子牧使禹濟司評禹諧佐郎禹集粹男濟遠府
君事親有淡愛平生未嘗一違志參議公嘗守金堤

府君時寓隣境每以魚瓜奉餉公喜曰官享豈能易
此常以祿養未終爲痛得一味必臉汝友于兄弟篤
于宗黨以宗家貧窮助祭且克致其誠閨門之內和
氣藹然每戒子弟曰忠厚謹慎是我家家法位高而
謙愈甚祿豐而侈不生非仕于朝必耕于野一毫無
求人亦不喜皎皎名與人交慤實不欺人有至親不
相能者府君涕泣曉諭感化者數輩自在小官以愛
物存心雖當死者必求其可生前後疏冤賑饑所全
活甚衆下至昆蟲草木之微亦不忍傷害惟於陰陽
淑慝之分處之甚嚴確然有責育不可奪者愛 君

之念一飯不忘常曰 國恩何可報也繹自學語優
學誦是言寢疾數月無一語及私府君歿後一年士
禍作人謂府君半藁之忠驗若著龜壬人又欲以宗
學事構禍賴 上聖明幸不售繹幼蒙膝置蒙駭無
所識至今想像但見其德容盎然若春陽今欲追述
志事而無由發揮其萬一只記純忠質行之塗人耳
目者以揭墓隧後之君子尚或有攷焉

從祖都正府君墓表

吾曾王考晚悔公有五丈夫子長曰翮字子羽生而
有至行事親盡孝丁丑江都之亂以身翼蔽母夫人

中虜矢絕而復甦夫人商山金氏亦赴烈火以死事
聞并旌其閭戊戌始筮仕癸亥相臣李公尙真白公
節行特陞通政階以褒之由是公之孝聞于一國公
貌古而質厚自少至老能全赤子心遇人無親疎貴
賤一以謙恭當世數善人長者必曰李公李公始公
以身殉孝而得不死若有陰相者卒之享大耄蒙顯
擢三弟俱大顯而奉公如嚴父昕夕怡愉以娛暮境
人皆艷歎焉以丙寅十二月十四日卒去其生 萬
曆庚戌七十七歷官 英陵參奉內侍教官內資主
簿麟蹄縣監 宗廟奉事及令敦寧都正而其 贈

隋書先生集卷四十一
吏曹參判則以所後子觀察使晚堅貴也葬于龍仁
泉洞晚悔公墓下晚悔公諱有謙參議 贈領議政
妣坡平尹氏處士弘裕女金夫人參議尙女後夫人
李氏國姓英彥女貞靜有婦德壽八十五後公廿年
而耐金夫人葬高陽香洞公五女韓聖龜司藝崔嵩
齊牧使林世良監役胤胤豪縣監柳應運李夫人出
晚堅公仲弟議政公諱翮之季子娶監司尹嘉績女
二男綬維女尹汲韓聖龜男配厚奉事配明配久配
淵女李思光李靜鎮林世良男象台別檢象奎象翼
進士象斗胤胤豪男礪文科女李顯相參奉柳應運

繼子統女李明益粹幼而幸及親公今以觀察公命
略記事行之大者若氏貫世德載于晚悔公碑刻茲
不復詳云

從祖母 贈貞夫人商山金氏墓表

敦寧都正李公諱翮之元配金氏商山人考尙觀察
使祖德謙參議號青陸妣羅州朴氏佐郎垣之女我
李系出牛峰 贈左贊成諱劼參議 贈領議政諱
有謙卽都正公祖若考也夫人十七歸李氏事舅姑
至孝丙子之亂議政公携家入江都翌年城陷遇賊
於吉祥山下姑尹夫人投身烈火賊射之都正公以

身翼蔽中矢絕而復甦夫人亦自焚渾體焦爛不即死以二月十二日竟不起年二十九是歲三月議政公負遺骸返葬於高陽香洞從先兆也事聞旌都正公及夫人曰孝子烈女之門始夫人歸寧于家朝夕有虜警諸婦女咸惴恐無人色夫人獨燕笑自如曰遇難即明白死耳卒如其言嗚呼此平日讀書談道者所未易而夫人能之豈不賢哉都正公繼娶完山李氏亦無子取仲弟右議政翽子晚堅爲後以晚堅貴 贈公吏曹參判夫人從 贈如例晚堅出莅東臬始樹石墓前而命緯識其陰

從祖判書府君墓表

嗚呼此我叔祖故吏曹判書農齋李公諱翽字季羽之墓也李出牛峰始祖公靖以武略顯于麗本朝觀察使吉培判書承健副提學之信以循良文學著至晚悔府君諱有謙師事沙溪先生質行純德儀式士林卒官戶曹參議配坡平尹氏處士弘裕之女舉五丈夫子公其季 崇禎己巳生 孝廟壬辰進士丁酉謁聖及第時伯仲都正翽 贈持平翽以節孝褒旌叔兄翔以遺逸徵吾王考議政府君爲翰林公爲說書後又同入玉堂往往伴直而晚悔府君猶無恙

降者先生集卷四十一
一世艷稱之歷敷清要侍講院說書司書兼弼善兼
輔德兵曹佐郎正郎吏曹正郎司憲府持平執義司
諫院正言獻納司諫弘文館副修撰修撰副校理校
理副應教應教禮賓司僕寺正擢通政承政院同副
承旨序陞至左戶兵工參議爲吏曹者屢大司諫掌
隸院判決事僉知中樞五衛將外則爲養監通津縣
臺啓請畱晉州牧使則爲凶黨所黜既赴而猶律以
厭避卽其地編配其在三司隨事盡職嘗上疏陳
上躬闕遺且斥相臣被酒失朝儀之狀 上批殿上
一鶚今復見之 孝廟遴擇材臣廉察諸道公得湖

左事未竣反 命于 殯殿後爲御史嶺南關東公
中年以遭金益廉事自引爲口語相質士夫所恥不
安於朝廷益廉爲公議所棄 上亦右公而猶懷踈
踏出爲原襄監司滿期而褫已未與議政府君同坐
尤菴黨籍分竄西北遇雷變特宥翌年朝著廓清公
復爲承旨尋擢漢城府右尹參判諸曹大司憲副提
學出爲慶尙監司纔數月遭夫人喪特許褫歸已而
擢刑曹判書移吏曹時當老少分析之會務欲激揚
羣小仄目尹世喜等以言官構誣公請罷 上震怒
痛斥其言 命削仕版左相閔公鼎重亦爲公伸辨

陶菴先生集卷四十一
而公甚不自安自後棲遑郊舍屢降 別諭敦召不
赴除江華府畱守京畿監司以外職不敢辭判尹參
贊禮兵二書知中樞復拜吏曹固辭免己巳以 國
葬都監勞陞正憲出爲廣州畱守兼守禦使無何時
象大變公首竄長興時都正公及議政府君已捐館
都憲公罹酷禍瘐歿公意悒悒成疾以庚午九月二
十五日卒于鵬舍壽六十二越四年甲戌更化復公
爵賜祭後追錄庚申鞫獄勞 贈左贊成公凡三娶
羅州朴氏府使淳女完山李氏監役宇梁女青松沈
氏府使之淹女皆無子側室男晚達尸其祀晚達男

綰進士奉事公初葬水原丁丑移卜龍仁慶項酉坐
原二夫人耐元配別葬泉谷先兆沈夫人自公歿誓
天絕穀所食惟冷水三載而卒嘻其烈矣嗚呼公以
文學才猷顯於當世而遭時蔑貞愠于羣小終至竄
逐以歿士類莫不悲之然公之一身與世道同其屈
伸大賢均其榮辱公亦何恨乎哉公容貌疎爽無塵
俗氣遇之者不知爲宰相與人言明白懇到臺臺可
聽爲文操筆立就辭理條暢一時瀛館盛才俊而章
劄多出公手筆法亦遒麗有情致繹幼時見公公退
讀小學後以御史過陽德縣老吏猶道公謫居時事

其言亦然又聞公晚年解官閒居挾心經往質于尤翁老而好學如此噫此豈可與俗人道哉尚記公燕處每彈指歎曰人生富貴何爲自傷其無嗣也及在謫中緯年十歲以書問起居手筆作答勉以門戶之責辭意激切至今藏佩不敢忘今老且死矣溪懼公平生行業湮沒無聞悉叙履歷且撮其志事之大者以遺綰之子濟仁俾刻于阡石

皇考妣阡表

維龍仁治東寒泉之洞牛峰之李世葬地也我皇考成均進士府君年三十一卒而葬葬四十有五年夫

人驪興閔氏祔其左崗則皇曾祖戶曹參議晚悔堂府君皇祖議政府右議政府君以次位焉小子緯不幸生五歲而孤大夫人以鞠以教俾至于成立見背之後又蒙餘庇以至于今今則老病且死矣府君之亡甲子亦一周矣始敢涕泣而表于阡曰府君諱晚昌字士夏議政府君之寓居扶安也府君生焉以甲子七月十七日卒於廣州官舍亦議政府君畱守時也其爲進士則在 肅宗元年乙卯緯孤而幼於府君容貌猶未能省記况其他乎緯之稍長也夫人令緯讀歐公瀧崗阡表而聽之至吾不能知汝之必有

立然知汝父之必將有後也歎曰何其言之似我也
仍涕泣曰歐翁雖不能博利於物而猶試於一命汝
父則不能也然吾於汝父亦有以知其一二皇舅議
政府君居常語及汝父必曰吾孝子皇舅又嘗詔童
幼曰折一方長殺一昆蟲非仁也自幼時未嘗一有
是焉者惟我與某兒夫汝父見乳者離絕其子而收
涕哺汝惻然終日曰食已子而飢人之子是可忍耶
嗚呼瀧表之辭曰其居家無所矜飾而所爲如此是
真發於中者耶其心厚於仁者耶此正爲汝父說道
也粹泣而識之不能忘粹又因仲父冢宰公得聞府

君爲人重厚謙恭言論嚴正識度過人觀書十行俱
下博洽羣書而於朱子綱目最熟爲文長於駢儷平
生少嗜慾惟喜酒襟懷坦蕩與人無畦畛云夫人驪
陽府院君文貞公諱維重女外祖同春宋先生有詩
曰父母教訓早聰明爾性然仍云辛丑書贈恒孫恒
夫人諱也粹聞諸夫人夫人八九歲間文貞公盡室
出廣之沙村議政府君送別于漢津文貞公於舟中
呼夫人出拜之曰此汝舅也庚戌文貞公出按箕藩
議政府君往而假館俾行親迎之禮夫人肅哲溫惠
配君子無違禮事舅姑盡其誠敬爲人母慈而有法

陶菴先生集卷四十一
婦道蓋備矣雖不讀書而通曉義理出言皆森然法
度兩弟忠文公鎮厚文忠公鎮遠咸服其達識至若
事行之詳見於幽誌而其關於小子出處之際世道
消長之會爲多緯再登高科賜暇湖堂爲弘文館大
提學藝文館大提學自知不才無能其所以致此者
惟府君不羸其躬而遺諸後爾蓋聞府君少與仲氏
言懷府君之言如此云夫人老年每以過分爲憂曰
當汝穉昧惰學時願汝爲知名之士而恐亦不能何
意及此夫人壽七十三而終戊申九月十九日也
肅宗己亥以緯推恩 贈府君吏曹參判夫人亦受

貞夫人真誥緯又嘗職守正卿例當加 贈而以辭
免不敢請後十五年始 贈資憲大夫吏曹判書兼
知義禁府事五衛都摠府都摠管實今 上己未也
緯凡再娶海州吳氏忠貞公斗寅女南陽洪氏僉正
禹賢女洪氏舉一男一女男濟遠文科弘文校理婿
參奉俞彥欽濟遠男曰木曰禾其餘男女皆幼

季父觀察使府君墓表

李公晚堅字士冬始葬廣州龜川其八世祖觀察使
吉培墓南越十有二載戊申移卜竹州九峰山下夫
人漆原尹氏附兄子緯表于墓曰我李出牛峰自高

麗侍中公靖至觀察爲七世後六世爲參議諱有謙
其嗣子敦寧都正諱翮以孝旌閭其仲右議政諱翮
夫人羅州朴氏僉中樞濠女是生公都正公取爲嗣
公少多疾及長發憤力學 肅宗戊寅魁泮製赴翼
年殿試癸巳通政歷官侍講院說書兼司書文學輔
德禮兵吏三曹郎司諫院正言獻納司諫大司諫司
憲府執義弘文館修撰校理應教議政府舍人軍資
監正承政院承旨戶曹參議掌隸院判決事於外監
果川縣尹廣州府觀察江原道 崇禎丙午十一月
乙酉生卒之日丁酉六月十四也尹夫人監司嘉績

女柔婉有婦德後公八年年五十八卒男綬縣監維
有文行蚤死女大司成尹汲進士元景厚洪梓柳愨
公明敏精密晚更溫裕所後大夫人年大耋承奉務
適意館妾姊畜孤甥咸盡其歡與人交悃悞無華喜
談史最熟於朱子綱目言議峻正在三司一以匡主
德扶士林爲主居官清慎所至得吏民心進少退多
官位低徊蓋公冲虛不自有世莫能知所知惟政事
才觀察墓久失其處公誠求不置卒得之篤於奉先
如此小子於斯文也不敢有一毫過溢者恐傷公謙
德而且當有大碑云

從弟大心墓表

嗚呼此吾弟維大心號知菴之所藏也君吾季父觀察使公諱晚堅之第二子而觀察公以吾祖考議政公命出爲都正公之後君與吾實同祖議政公君生於肅宗甲申四月十六日卒於今上戊午五月一日葬于都正公墓右麓負辛之原室孺人安東金氏郡守時發女仙源先生其五世也有緹縈行君甚宜之卒與同祔無丈夫子一女士人洪樂春後娶南陽之洪主簿正度之女吏曹判書處亮之曾孫也君氣大才疎重交游好議論最嚴於淑慝邪正之分而

常有汲長孺之風親於己者過與之不附己者赤憎之人多畏而憚之從幼學于余篤信無異聖人有一毫非議之言出於人口而入於吾耳則必惡之如大慝人比之子路四方游學之士君善爲之周旋其間無一人不得其歡嚴師弟之禮使吾道益尊嘗扁大庇於小菴有共濟天下之意終莫能一施焉性喜山水爲余圖得鶴泉一區樂而忘返將死無他語惟曰鶴泉可直一死勿以我死而棄之爲文章通達不事雕飾興至隨意陶寫亦不自貴重鄉里人士多來學者及其喪哭之皆哀余與君出入居處若不可須臾

離者而君之舍我已九年于茲今方歸故里屬潘生宗述曰吾居墓下十九年未了惟此一事子能爲我成之否潘亦義人素聞君風而慕之甚必能盡心刻成如吾在時也

外祖母豐昌府夫人趙氏墓表

肅宗七年辛酉 仁顯王后正位壺極我外王考閔文貞公諱維重由兼兵曹判書封驪陽府院君文貞公凡三娶海豐府夫人李氏恩城府夫人宋氏從贈如例貞敬夫人趙氏亦錫號豐昌府夫人越七年丁卯文貞公捐館舍己巳之變盡收封誥甲戌復還

授趙夫人享有尊榮六十有餘年國家有吉凶大事往往承 命入大內文貞公二男忠文公鎮厚左議政鎮遠爲世名臣其事夫人忠養備至夫人常稱忠文公曰不知古所謂孝子視此何如爾及忠文公卒夫人常從議政公居其謫原城及自驪而廣自廣而京也輒奉以往議政公又卒夫人自以餘日無幾願歸守文貞公墓 上聞而愍之賜手書諸孫俾止其行數使掖隸訊起居疾則醫問不絕每歲首優致惠養以今歲爲封爵周甲筵中屢有 恩言夫人偶感微疾三月二十二日終于安國坊賜第春秋八十三

降者先生集卷四十一
上震悼弔祭如儀遣中使庀喪以景廟常月賜廩
命限三年勿收隱卒之典嗚呼至矣豐壤之趙肇自
高麗侍中孟曾祖諱邦亮參奉贈承旨祖諱仁亨
正郎考諱貴中成均生員妣清州韓氏掌令縝之女
以節行旌閭夫人生于孝廟己亥二月丙辰十八
歸于文貞公文貞公時已躋崇班矣觀察使贈領
議政諱光勳府尹贈領議政諱機庫令贈吏曹
判書諱汝健文貞公三世而外祖曰延原府院君李
公諱光庭夫人端莊靜一自幼有女中君子之稱神
安氣定雖當倉卒聲色不遽居常穆然罕言笑而及

老更和厚婉曲疾時亦必整飭衣衾雖小孫在傍不
令見體服用簡素無異寒士家年方大耋猶手執鉞
線曰人不可閒坐度日事無專制必問而後行諸子
歷官內外未嘗干以毫髮私屢出入禁庭而宮人無
一親熟者絕無以宮內事說與人夫人之德蓋不可
勝書而勤儉慎密乃其大者又素性謙挹平生口不
道己能家人子孫亦不能盡知也夫人舉一男二女
男鎮永正郎女適進士李長輝參奉洪禹肇正郎男
樂洙直長覺洙李壻子潤潢洪壻子啓承啓能也恩
城府夫人實誕毓聖女而吾先妣忠文公議政公

陶庵先生集卷四十一
皆其出忠文公嗣子曰掌令翼洙五月二十一日葬于龍仁縣東壽院洞用一等禮既葬卽樹石墓前爲文以刻于陰亦用 恩庇也文貞公墓在驪州蟾樂里二夫人耐 肅宗嘗手書大字以表之云

墓誌一

圃隱鄭先生墓誌

圃隱先生旣歿二百有餘年尤菴宋文正公時烈爲大碑建于墓前其後垂七十載後學三州李緯又敢爲之誌誌曰嗚呼天之眷佑我東土久矣蓋自殷師受封以來吾道已東而洎乎麗氏八百餘年味華夷

之大限醉佛氏之糟粕幾乎夷狄禽獸之歸矣亂極當治有開斯先於是篤生我先生以啓吾邦文明之運天意豈偶然哉先生諱夢周鄭出延日知奏事襲明之後祖諱裕考諱云瓘俱贈顯官以先生貴也先生以丁丑十一月戊子生于永川愚巷里母李氏屢有異夢及生肩上有黑子七列如北斗十九歲丁父憂時喪紀大壞先生獨自貳於流俗廬墓以致哀丁酉中進士第三名庚子魁三場爲文科狀元壬寅藝文檢閱癸卯郎將兼閤門祇候以韓邦信從事官征女真于和州甲辰戰勝而還除修撰典農寺丞乙巳

陶菴先生集卷四十一
丁母憂居廬一如前喪事聞旌其閭丁未禮曹正郎
兼成均博士兵革之後學校荒廢至是新創成均館
以牧隱李公穡兼大司成先生與李公崇仁金公九
容朴公尙衷同爲館職學子全集庠舍不能容每講
先生講說發越超出人意諸儒莫能及時經書之來
東方者惟朱子集註而後得雲峰胡氏四書通典與
先生所論靡不昭合牧隱亟稱之曰達可論理橫說
豎說無非當理達可先生字也戊申大明開國先
生力請歸附壬子以成均司成爲書狀官入朝還至
海中許山遭颶風上价溺歿先生萬死一生割韜而

食者十三日帝聞之具舟楫遣還厚加調恤仍詔
諭高麗去京師萬餘里宜從古昔三年一聘之禮方
物止用土產子弟亦許入學蓋異數而實先生專對
之力也甲寅授慶尙道按廉使乙卯藝文直提學尋
拜大司成先是金義擅殺明使而朝廷不之問自
懷疑貳會元使來權臣李仁任等欲復事元先生慨
然與同志抗章請勿迎北使專意事大爲仁任等所
構陷先生流彥陽居二年宥還丁巳倭寇數侵掠濱
海蕭然先遣使講和而至被拘囚先生遂應命報聘
人皆危之先生無幾微見色及至極陳古今交隣利

降者先生集卷四
害酋敬服館待甚厚比還還其俘禁三島不復侵掠
已未典工禮儀典法判書進賢藝文館提學庚申版
圖判書密直寶文閣提學辛酉僉書密直司事甲子
政堂文學時國家多釁天朝將加兵於我增定歲
貢以五歲不如約杖流使臣至是當遣節使衆皆憚
行規避最後始屬先生先生聞命不宿于家倍道趨
節日進表帝嘉歎優禮以送丙寅復如京師請冠
服之制翌年還始議定百官冠服盡革胡制戊辰三
司左使門下贊成事奏革私田以祛民弊己巳藝文
館大提學庚午進門下侍中益陽君忠義伯王欲迎

僧粲英爲師先生於經筵進言儒者之學皆日用平
常之事飲食男女人所同也至理寓焉堯舜之道亦
不外此貴在動靜語默之得其正而已彼佛氏之教
則不然辭親戚絕男女獨坐巖穴草衣木食以觀空
寂滅爲宗是豈平常之道乎時俗尚佛忌日齋僧時
祭只設紙錢先生請令士庶倣朱子家禮立廟作主
以奉先祀禮俗復起壬申二月大明律來先生取
本朝法令參酌成新律以進我太祖大王功德日
盛天命人心已有所歸獨先生毅然有不可奪之節
使臺諫劾去心腹鄭道傳等以殺其勢時朝野恟懼

陸者先生集卷四十一
禍在朝夕有山僧贈詩曰江南萬里野花發何處春
風無好山先生流涕謝之曰嗚呼其晚也其晚也四
月四日行過大街至善竹橋爲趙英瑾所害先生亡
而麗氏遂亡矣嗚呼先生之忠可謂與日月爭光而
於先生特一節爾夫人之所以爲人者惟理義爲大
華夷之分儒佛之辨至先生而判焉至今環東土數
千里能免爲夷狄禽獸者是誰之賜也先生之學傳
於吉注書再又三傳而得寒暄堂金文敬公宏弼以
至于靜菴趙文正公光祖則其爲東方理學之祖者
豈不信然嗚呼盛哉先生初葬海豐郡後 永樂丙

戌移卜龍仁慕賢村文秀山坐辰之原夫人敬順宅
主慶州李氏耐男女各二人男宗誠宗本女婿成翼
之李長得後孫甚蕃不能盡記系以銘銘曰
斯惟先生之藏與天地而久長盛德大業昭晰無疆

縣監申公墓誌

夫天地之間惟人爲大而人之所以爲人惟忠與孝
而已斯二者本無二致然隨其所遇而成就各異又
或有顯晦之不齊是以鮮克兩全余於 萬曆間得
一人焉曰申公吉元公平山人字慶初生有至性幼
而父母病能號天祈代又斷指和藥以進以續母命

十四遭外艱啜粥以終三年哭泣甚哀弔者爲之流涕平居服勤雖滌溷之節不令人代之家素貧而甘旨之供未嘗乏絕州里以聞 宣祖大王嘉其行命旌之曰孝子之門又歲給布繒食物丙子中司馬用太學薦除 禧陵參奉不仕後復由 寢郎序遷數官爲聞慶縣監居三歲壬辰倭寇大躡一道時巡邊使李鎰在尙州公亟往問策爲調兵輸餉復馳還事未集列鎮崩潰賊兵且薄境衆曰兵單勢急不如姑避之公厲聲曰守土之臣死於封疆義也時公已先送母夫人避兵于京顧謂庶弟吉成曰吾受 國厚

恩今獲死所夫復何恨汝歸告老母母在而子死固非孝而爲國致命亦忠也又曰爲吾語家人善養吾母勿以吾死而有異也左右皆泣旣而賊大至吏士皆散一官奴金龍者獨不去公冠帶佩印而坐賊露刃脅之曰汝能馳馬否公曰我儒者安能馳馬又曰汝速降署名公不屈又使指路公大罵曰恨不斬汝萬段因以手畫頸曰有此而已賊怒先斷右臂曰猶不可指路乎公色不變罵不絕口賊遂副之是四月廿七日也年僅四十五事聞 宣祖大王又表其門曰忠臣嗚呼公以一身而任父子君臣之倫生而不

附錄先生集卷四十一
愧於天地死而有光於家邦何其烈也蓋聞公自少
篤於爲己之學口不出不正之言身不蹈非禮之事
尤好觀濂洛羣書用作規繩故所成就若彼卓然雖
其資性有大過人者而學問之力亦不可誣嗚呼爲
士者不可不讀書也公高麗壯節公崇謙之後入我
朝判書諱大司憲彝最顯有諱景文監察公錫縣監
國樑持平是公三世妣完山李氏其考始寧令賢全
也公初娶東興府院君權常之女無育繼配司醞署
令河世濬之女一男二女男命休生員教官婿牧使
李愴掌令李瀼 宣廟嘗命刊公事行於三綱續編

後百有餘年邑人即公殉節之所立石以識之其所
以表揚者殆無憾矣後孫喆謁余以幽堂之誌余亦
夙慕公風烈樂爲之役公墓在楊州軍場里云銘曰
嗚呼千百代之下過是墓而不式焉者吾知其無人
心也

校理李公墓誌

南方學者盛推天默李公公 仁祖朝講官學術精
淡尤長於易云我 太宗大王別子曰孝寧大君補
是後瑞原諱案高林諱薰漆山諱璿孫仍三世襲君
公考諱昱漆山之曾孫以孝聞親喪躬負土成墳妣

長興任氏大英女公八歲避兵嶺南華人相之曰大人也未冠從李活溪大邑受經書發憤忘食覃思實踐餘力貫穿諸家晚又游沙溪文元先生之門先生歎其敏學壬子司馬乙丑及第補成均館一日攝堂后入講筵愚伏鄭公經世谿谷張公維咸推公經學上命參講問以尚書椿三百璿璣玉衡註及潮汐之理仍及他經疑義公應如扣鐘及退 上使中貴人問李某世闕如何尋拜侍講院說書遷司書移禮曹佐郎拜司諫院正言褫爲典籍入兵曹爲佐郎正郎改司憲府持平由文學爲正言者再知製 教乞養

爲玉果縣監丁母憂旣吉拜弘文館副修撰上疏陳修攘之策以正君心爲本辨君子小人爲得人之要丙子虜兵犯京扈 駕入南漢爲督戰御史上劄論守城方略且請諸將逗留之罪下城亟言金慶徵張紳李敏求罪可誅而兩司附勢廢法旋移疾南歸復拜修撰移持平密疏言大義者三綱之倫五常之序捨此則人類禽獸中國夷狄不可一日廢者我邦二百年臣事 皇朝義則君臣恩同父子於戲其可忘乎今雖不幸至此 皇朝貢路不可復絕亟宜示哀痛於國內暴誠忠於天下使知慘惻不得已之意不

隆者先生集卷四十一
報再除校理掌令皆不赴冬除輔德當赴藩公病甚
自載入都尋免爲司諫校理又兼春坊復以疾歸庚
辰 上違豫以執義一赴 召是後屢除官不就
召命則加朝服涕泣而已病中惟觀朱子書有時掩
卷噓唏其微意可知也公諱尙馨字德先生卒俱乙
酉公敦厚縝密謙以自牧平生不言人過惡温然君
子人也至其臨大事守大義確然有不可拔者進退
出處之正其有得於易之時義歟公嘗曰陽一分長
則陰一分消天理人欲亦相爲消長孔子到乾卦顏
子到泰卦又曰易者聖人欲使誠善補過也人能誠

於爲善則可以補過矣是以其學一以真實不欺爲
本在政院時譚易尹承旨知敬等輒起拜之配善山
林氏副正克立之女先公十五年卒葬于任實鍾山
五男三女男文獻文源文載參奉文英文啓進士士
人尹砥參奉楊雲舉士人吳添喜其婿聖著聖虎聖
龜聖鳳長房出二房一女爲持平崔致翁妻聖麟聖
眞聖元三房出聖麒聖鸞四房出五房男聖憲女承
旨尹弘禹曾孫頤根朝廷徵爲 世子諮議頤正亦
世其學慎齋先生嘗作公碣文後公孤文載撫其遺
事請房參奉斗天成行狀矣頤正來乞幽堂之誌余

亦慕公名行者爲之銘曰
長陵御極者俊盈廷公挺其間珥筆談經衆賢推轂
王曰誰子 太支于南三世不仕玉堂淡嚴乃處宿
儒蒼黃執鞫慷慨援桴孤城三版地裂天傾公曰於
戲敢忘 大明相彼流水亦流于東微公一言噫吾
其戎雖言不行義則日星伏枕幽吟山榛隰荅維易
有象進退偕時含章守貞公實以之豈必贏金後孫
其承我銘其行百世于徵

花浦洪忠正公墓誌

嗚呼此 大明忠臣花浦洪忠正公諱翼漢字伯升

衣冠所藏之地也夫棺槨所以掩形也墓所以藏棺
槨也無其形而爲之墓不亦虛乎然氣魄固不可得
以埋而亦無所不之衣冠者形之所親而氣之所依
則又不可以無葬葬而誌禮也既有葬則惡得無誌
此公嗣孫禹錫之嘗屬絳爲文者也誌曰公南陽人
初諱霄高麗金吾衛尉先幸其鼻祖而有左贊成諡
莊僖淑顯於我 中宗朝是生觀察使叙疇於公爲
曾祖祖諱磻縣監考諱以成進士有文行妣金氏承
旨彥沈之孫公生於 萬曆丙戌十一月二十二日
其伯父秉節校尉大成取以爲後乙卯生員甲子

仁祖南狩至公州庭試多士公爲壯元歷成均館典籍司憲府監察世子司書司諫院正言兵曹佐郎正郎於外爲高靈扶安縣監高山察訪以書狀官航海朝天其爲正言時極論叛賊姜弘立導虜犯順之罪請誅之不報丙子爲司憲府掌令時虜僭號遣使來要我共蒙古尊之爲帝公痛哭上疏曰臣自墮地之初只聞有大明天子耳寧有魯連之死不忍使斯言汙耳孔也我東素稱禮義之國天下謂之小中華而列聖世修藩職事大一心恪且勤矣今奉虜而臣之縱延晷刻之命其於祖宗何天下後世

何臣未知處廟堂者何人而高枕熟睡君父受侮視若尋常然則虜人之稱帝非虜人自帝實廟堂使之也臣謂宜戮其使而取其書聞于皇朝速下哀痛之教檄召八方之士諭以大義則滅虜之期可指日也不納崔鳴吉乞送小譯於瀋陽以探賊情意欲潛通和好也公引義面責之鳴吉大慚恨先是公之兄翼亨隱于小白山下公有書云欲挈家爲老年相依計蓋已有蹈海之志矣是冬虜復入寇上幸南漢鳴吉言首斥和議者洪某也可使禦敵遂除平壤庶尹趣之官時寇迫路阻公奉母置江都從海路西

隋書卷四十一
下及到平壤賊已充斥入保寶山城招諭兵民流散
還集莫不以死守爲心旣而鳴吉等執送斥和人於
虜以公爲首令道臣執公于任所送虜營時丁丑二
月十二日也公聞命疾行至義州林慶業爲府尹
迎謂曰明公此行眞男子事也身扶大義名光竹帛
死亦何恨及渡江路上羣胡見公械繫以去莫不嘖
嘖稱歎曰此義士也至或有勞慰之者至瀋陽汗置
于別館供饋甚盛公却而不食曰此非禮之食也其
將龍骨大使問曰汝何故入來公曰吾以斥和臺諫
被執而來耳曰斥和者豈獨汝一人乎公笑曰吾有

一死而已豈誣引他人耶又謂龍胡曰去年汝之來
我邦也上疏請斬汝頭者我也龍胡亦笑而去公自
在亂中遠念家國存亡忠憤激烈往往見於吟咏之
間至是又有一律辭意悲壯聞者爲之下淚三月五
日汗盛其兵衛將訊公公方食聞之顏色自若食訖
卽縛公兩手以前促迫甚急而公步履益安徐屹然
立庭下汗命解其縛謂曰胡不跪公曰此膝豈屈於
汝耶羣胡起立聳觀汗曰汝之先背盟而斥和使二
國成釁何也公曰先背盟之失在汝乎在我乎汗無
以對良久曰汝旣首先斥和則大軍之來何不迎擊

反爲我禽乎公曰我之所執大義而已成敗非可論也且使我國臣民一如我志則爾亡無日矣卽解衣投地曰聞爾國刑人必劓何不速劓我仍索筆書之曰 大明朝鮮國縲臣洪翼漢斥和事意歷歷可陳而語音不相慣曉當以文墨控白焉夫四海之內皆可爲兄弟而天下無兩父之子矣朝鮮本以禮義相尙諫臣惟以直截爲風故上年春適受言責之任聞爾國將渝盟稱帝心以爲若果渝盟則是悖兄弟也若果稱帝則是二天子也門庭之內寧有悖兄弟哉覆載之間寧有二天子哉况爾國之於朝鮮新有交

隣之約而先背之 大明之於朝鮮舊有字小之恩而漢結之忘漢結之大恩守先背之空約於理甚不近於事甚不當故首建此議欲守禮義者是臣職耳豈有他哉但臣子分義當盡忠孝而已上有君親俱不得扶護而全安之今 王世子大君皆爲俘老母存歿亦不知良由一疏之浪陳以致家國之禍敗揆諸忠孝之道埽地蔑蔑矣自究乃罪可殺罔赦雖萬被誅戮實所甘心血一釁鼓魂去飛天歸遊故國快哉快哉此外更無所言惟願速死速死汗使華人譯而聽之歎曰難矣哉此人也仍出示公斥和疏曰吾

不可爲皇帝耶公曰汝乃 天朝叛賊何爲得帝也
汗大怒令二胡扶而出蓋其刑人者也拘公蒼頭於
別館使不知其處後以鞍馬衣衾并還之公死時年
五十二 昭顯世子方在藩命以衣帛招魂而送焉
時公闔門遇禍而獨母夫人無恙而公不能知矣嗚
呼人皆有一死而死或輕於鴻毛重於泰山者惟所
遇不同耳若公者以海外偏邦之一陪臣爲 天子
守節而死不獨使吾邦禮義之風永有辭於天下後
世抑亦孔朱以來春秋大一統之旨賴公而益明韓
愈氏所謂萃乎泰山不足爲高者非斯之謂歟 孝

廟嘗除翼亨教官而不就足不出山門酒後每痛哭
仍晦迹以終身天地間正氣可謂萃於公門矣公之
配許氏遇賊於江都子晬元以身翼蔽死於賊鋒晬
元元配具氏出也許氏自投水晬元妻李氏亦自刎
於晬元之傍朝廷并旌其門閭嗚呼烈哉公累 贈
至議政府領議政 肅廟爲作哀三學士詩其 幸
溫泉也特遣官祭公之墓墓在平澤縣西鯨井里先
兆許氏祔章甫建祠於其下而祀焉今 上乙卯特
賜春秋祭需于家公以翼亨子應元爲子直長禹錫
其男敦寧府都正都正之子澍又無嗣繼子曰侃侃

陶菴先生集卷四十一
翼亨之玄孫方爲參奉內外子孫不能記銘曰
天高日昭亘萬世也有踐斯墳無人心者

都事柳公墓誌

公諱萱字汝實文化人柳氏出高麗大丞車達我朝
右議政文簡公寬以清白著曾祖諱用諶生員從金
慕齋兄弟學祖諱益 贈參判考諱公亮禮曹參判
有文武才 仁祖甲子枉被慘禍卽伸雪復爵士大
夫至今嗟傷之夫人驪興閔氏進士思溫之女兄弟
三人公序居二 萬曆丙戌生七歲遭倭亂流落西
陬雖兵戈搶攘不廢讀書未成童盡通四書二經從

崔簡易豈學爲古文詞又學詩於詩人李達士大夫
子弟多避兵者與之遊莫或之先也十餘年始還漢
師大小發解輒居上游庚戌司馬筮仕爲修城禁火
司別提調通禮院引儀出監永同縣癸亥反正 上
遣御史行八路澄汰官吏御史還白公慈詳愛民
命陞叙尋以微事棄歸以策魁漢城試張谿谷維爲
考官歎曰此文衡手也未幾丁家禍廬墓下以終喪
自是廢舉寓居利川之碧溪洞惟以山水自娛戊辰
除監察一謝優歸乙亥由宗簿寺主簿爲和順縣監
秩滿復宰昌平間爲戶曹佐郎儀賓府都事或辭或

附錄先生集卷四十一
赴公之在湖南增損藍田鄉約以行之又用朱子社
倉法以備荒政方伯考曰化民成俗又曰政遵古道
自昌平還不復仕年七十六卒辛丑閏七月五日也
葬於同府聖齊洞負乾之原祀溪俞氏耐俞氏考同
樞大祺舉四男二女誠厚謙厚生員譚厚承旨諷厚
寺正洪茂教官魚震顛其婿也長房男昫女李東淵
二房四男皦哇皆生員睐繼季父後疇繼叔父後女
進士韓鑰公側出一女未笄而死於丙子之亂旌其
節公爲人端雅遇事果決聰明絕倫博覽強記尤熟
於禮學而務爲韜晦不以自居其視名利財貨若澆

已然家世清寒疏糲不給而常適然也撫育兄孫妹
女婚嫁以時於親戚極其愛非其人不與交終日危
坐不以疾病少懈雖倉卒未嘗疾言遽色其德性如
此在昏朝屢第而忤凶黨輒見拔遭罹禍故自屏田
畝間黽勉祿仕而非其志栖遑下邑卒不得展布所
蘊人皆惜之自號節初堂有文集若干卷吾曾祖晚
悔公嘗與公友善至老切磋不倦公之後孫文濬託
以幽堂之誌後生蒙陋顧何所知識而義不敢辭第
據其狀而爲之辭系之以銘銘曰

簡易之文蓀谷之詩具此兩美蓋自得師中丁家難

附錄先生集卷四
若窮無歸間就祿仕迹與心違數邑絃歌猶見儒化
華國之手虛老田舍齋志以歿命也如何寂寥篇章
令人吁嗟林泉舊居想像遺風我闡厥美以納幽宮

觀察使李公墓誌

公諱天基字載元延安之李自樗軒文康公石亨始
大顯其後牧使夔以儒學名是生廷秀郡守生贊縣
監生時程義禁府都事於公爲考其配遂安李氏縣
監亨長之女公美風儀眉目如畫年十二通諸經文
藝日進癸酉司馬乙亥 上謁聖取士公中丙科始
補槐院薦入藝文館檢閱待教奉教兼 世子侍講

院說書遷成均館典籍禮兵二曹郎司諫院正言司
憲府持平時一二卿宰有奴犯法而匿諸家者公劾
正其罪光海訃至禮官請百官會哭公謂光海得罪
宗社不可以舊君待之議遂寢乞外得扶安縣監入
爲弘文館修撰校理間爲獻納禮曹請 王世孫行
冊禮 上以未冠難之公援據古昔請以空頂黑幘
雙童髻受冊己丑 仁祖禮陟以五禮儀無大臣禮
官入參大歛一欵 命議啓公引喪大記及疏家所
論以奏且曰滕文公爲世子不聽百官之言終行古
禮今羣下所望於 嗣聖者豈不及於滕文而反用

五禮儀草創未備之制也公於禮書用力深雖倉卒立草考據精而辭理到輒見施行清陰金文正公論吏判沈詔而嚴鼎者等交章右詔公上劄痛辨其是非時二宋先生赴朝以激揚爲己任同春始論竄自點公亦上劄申請既而同春欲并劾其黨與公以獻納難之以爲宜徐待 山陵之畢同春引避斥以觀望尤菴復提公避辭論辨甚力公卒被褫罷蓋公言論務持重而大義未始不同故尤菴晚與人論此事曰此吾輩不相悉之致云辛卯除吏曹佐郎移議政府檢詳舍人受暇省覲還陳湖西民瘼 上嘉納歷

司諫副應教執義又求外得韓山未赴還執義乙未以實錄都廳勞陞通政金公始振以推刷御史之慶州請別擇本倅 上問誰可者以公對遂除慶州府尹居二年繡衣上治績 特命加資旋寢錫馬還爲判決事承旨戶曹參議由驪州牧使拜忠清監司以母老陳情乞解特授忠州以優其養其後又爲仁川忠州時相積居其境乞得烟軍築私堰而堅不許其守法不撓如此乙巳丁憂及吉周流諸曹公不樂在朝爲就閒得鐵原以庚戌七月十一日卒于府衙壽六十四公敦厚忠實濟以文雅望之可知爲長德人

事親至孝家甚貧每躬自耕漁以供甘旨居官不以一物自累而如親意所欲則爲之極力營辦雖大州務劇而定省侍食未之或廢衙罷必公服在傍取當日所決公事一一奉白曰可而後充然而喜大夫人老而失明食必奉匙衣必挈領起居坐臥必躬親扶之至愛懇惻觀者感動平生不營產業無家於都田不增一畝爲州郡時謂家衆曰汝曹在家糠粃不厭而幸藉國恩安坐飽飯於分過矣如是而尙可剝公肥私乎罷歸之夕家人稱貸自給然而絕不爲斬截之行以要名譽人亦不能盡知也在講筵善陳說

經義爲文明白簡當一時絲綸多出其手云蓋公雅志恬冲不汲汲榮進故中歲以後蹭蹬不振卿相皆其後進公則低徊冗散而無一毫愠色其累求外補者不欲以三公換一日之養耳世或疑公坐已丑一事而沉滯此豈知公者哉後以側出子同知鶴老推恩贈吏曹參判夫人南陽洪氏牧使履一之女舉五男二女有老縣監嵩老德老縣監景老成老嵩老德老皆出後人士人宋奎章趙爾鼎其婿長房男軒佐縣監商佐僉知女適崔晚奭崔暉魚景龍僉正魚史周二房男義佐宣佐命佐女適黃濬三房男元佐蓋

佐女適進士朴仲錫判書閔鎮厚文佐衡佐箕佐弘
佐忠佐良佐四房出而五房無後曾孫曰鉉祥進士
台祥奎祥應祥夏祥重祥泰祥縣監麒祥武科濟祥
鼎祥觀祥最祥進士會祥興祥恆祥宗祥而鉉祥實
尸公祀趙壻之孫彥臣參判命臣參議虎臣兵使餘
不盡記公墓在陽智山墓洞癸坐之原夫人祔最祥
從余游以諸父兄之命來請銘銘曰

樗老之後師靜友晦儒素傳承以及公世公貌如玉
厥美蘊內盛之金鑾華衣光佩而公而卿晉塗誰礙
非我思存曰有親在反哺斯急夕照難貸左右以相

藹然淡愛榮利之場衆趨我退低回朱紱白首靡悔
環視其居風雨不蔽何以遺後清白家計位不滿德
有識攸慨我闡厥幽昭眎百載

副提學沈公墓誌

惟沈氏遠有世序自定安公德符始顯于世子孫相
繼爲公卿名臣戚聯 后姻事載國史公之曾祖諱
友正以上第官止驪州牧使祖諱誼累官禮曹判書
考諱東龜弘文館應教妣金氏左議政命元孫也公
諱攸字仲美其仕在 顯宗 肅宗之世以清名直
道爲弘文館副提學位非不顯榮矣而論者謂其不

止於斯而已則其人可知也公爲人寬厚忠勤議論正平不喜爲崖岸斬絕之行然於邪正是非之際正色直言累躓而不悔其義如此 崇禎甲寅李宇鼎等引已亥議禮將論尤菴文正公公以司諫奏陳文正公無罪小人構害狀 上怒黜公未幾羣凶復因事構誣之編配廣州久而得釋當是時 肅宗新卽位羣凶用事朝臣皆危懼不敢言公獨毅然不顧也故遂菴權公贊之曰一言出口奇禍立至而公之所樹立若此雖古直臣何以過之斯公之實錄也公幼穎秀勤於詞學以進士登庚寅文科由承文院正字

轉承政院注書薦入翰林辭不就己陞成均館典籍兵曹佐郎補龍安縣監 顯廟初召拜司憲府持平先是判書公從南漢使虜以非罪奪爵公上疏白其冤報罷丁父憂服除拜司諫院正言出爲金堤郡守以事謫配長城還拜掌令論相積奉使辱 命之罪不報遷獻納又論積徒之嫁禍士類者又言文谷金公因事被嚴責不可尋遷司諫連除司導寺正成均司成轉爲執義因災異上疏極言修德保民之實又曰言路之開閉關國家之興亡 殿下好自聖而惡直言此 聖學不明本源多蔽故也公爲臺諫前後

附錄先生集卷四十一
數十年隨事盡言侃侃不撓其大者如是餘可略也
公精於吏治嘗爲沃川郡守一境稱治去後磨崖以
思宋文正公爲之記還拜司諫知製教試士湖南
歷司僕寺正世子侍講院弼善輔德出爲安邊府
使居數年代還其自廣宥還也復拜司諫移弘文館
校理議政府舍人由應教擢承政院同副承旨兵曹
參知禮曹參議癸亥拜黃海監司坐事罷入爲大司
成吏禮戶曹參議大司諫上疏斥尹拯誣悖狀并論
其黨之營救者丁卯秋萬壽殿災公以副提學侍
上陳戒於是上入邪黨言頗厭薄善類文谷公以

卜相忤旨去朝公先幾進言反復不已冀以弭國
家之禍而上不能用明年除刑曹參議遽以七月
六日卒于第春秋六十九從葬通津文殊山下公卒
之明年凶黨果秉國甲戌更政始遣官祭公廟公以
直道忤於時判書公久未雪冤公含痛在心無進取
意肅宗庚申用文谷公言始伸其枉人謂公誠孝
之感也其事太夫人盡其禮與兄弟友其心恬於勢
利而好儉約也常居江上從宦而不營第於京師平
居簾閣據几從文人學士觴詠自放於江山之間悠
然不自知其外之有榮辱利害事然其愛君憂國之

陸者先生集卷四十一
心至老而未嘗忘也夫人完山李氏司議命悅之女
慈惠好施與配君子無違十三年而卒耐葬公墓有
四男三女男漢柱郡守 贈參議漢章漢瑞漢規直
長女李弘廷僉正丁道晉李世禎都正孫男鳳輝牧
使鳳儀正郎鳳威鳳逸鳳仁鳳觀曾孫監司聖希賢
希士希道希泰希顯希元希內外孫曾摠若干人公
善爲詩有集行于世別自號梧灘云銘曰
允矣梧灘外夷中方才敏而瞻學博而彊平居自弛
文酒江山其在朝廷讜言犯顏憂溪慮遠邪正之交
彌縫幾先弗艱于堯恬清儉恭惟德之緒我最其大

以永終譽



